

蜀志

晉 常璩著 吳郡汪明際闕



蜀之爲國肇於人皇與巴同囿至黃帝爲其子昌意娶蜀山氏之女生子高陽是爲帝學封其支庶於蜀世爲侯伯歷夏商周武王伐紂蜀與焉其地東接于巴南接于越北與秦分西奄峨嶓地稱天府原曰華陽故其精靈則井絡垂耀江漢遵流河圖括地象曰岷山之下爲井絡帝以會昌神以建福夏書曰岷山導江東別爲沱泉源深盛爲四瀆之首而分爲九江

其寶則有璧王金銀珠碧銅鐵鉛錫諸聖錦繡罽毼犀象氈氍丹黃空青桑漆麻紵之饒滇獠寶焚僮僕六百之富其卦值坤故多斑綵文章其辰值未故尚滋味德在少昊故好辛香星應輿鬼故君子精敏小人鬼黠與秦同分故多悍勇在詩文王之化被乎江漢之域秦幽同詠故有夏聲也其山林澤漁園圃果瓜四時代熟靡不有焉有周之世限以秦巴雖奉王職不得與春秋盟會君長莫同書軌周失綱紀蜀先稱王有蜀侯蠶叢其目縱始稱王死作石棺石槨國

人從之故俗以石棺槨爲縱目人家次王曰栢灌次王曰魚鳧魚鳧王田於渝山忽得仙道蜀人思之爲立祠後有王曰杜宇教民務農一號杜宇時朱提有梁氏女利遊江源宇悅之納以爲妃移治郫邑或治郫上七國稱王杜宇稱帝號曰望帝更名蒲卑自以功德高諸王乃以褒斜爲前門熊耳靈關爲後口玉壘峨嵋爲城郭江潛綿洛爲池澤以汶山爲畜牧南中爲斷苑會有水災其相關明決玉壘山以除水害帝遂委以政事法堯舜禪授之義遂禪位於開明帝

升西山隱焉時適二月子鵲鳥鳴故蜀人悲子鵲鳥  
鳴也巴亦化其教而力農務迄今巴蜀民農時先祀  
杜主君開明位號曰叢帝叢帝生盧帝盧帝攻秦至  
雍生保子帝帝攻青衣雄張獠熒九世有開明帝始  
立宗廟以酒曰醴樂曰荆人尚赤帝稱王時蜀有五  
丁方士能移山舉萬鈞每王薨輒立大石長三丈重  
千鈞爲墓志今石笋是也號曰笋里未有謚列但以  
五色爲王故其廟稱青赤黑黃白帝也開明王自夢  
鄩移乃徙治成都周顯王之世蜀王有喪漢之地因

獵谷中與秦惠王遇惠王以金一筥遺蜀王王報珍  
玩之物物化爲土惠王怒羣臣賀曰天奉我矣王將  
得蜀土地惠王喜乃作石牛五頭朝馮金其後曰牛  
便金有養卒百人蜀人悅之使使請石牛惠王許之  
乃遣五丁迎石牛旣不便金怒遣還之乃嘲秦人曰  
東方牧犢見秦人笑之曰吾雖牧犢當得蜀也武都  
有一丈夫化爲女子美而豔蓋山精也蜀王納爲妃  
不習水土欲去王必留之乃爲東平之歌以樂之無  
幾物故蜀王哀之乃遣五丁之武都擔土爲妃作冢

蓋地數畝高七丈上有石鏡今成都北角武擔是也  
後王悲悼作史邪歌龍歸之曲其親埋作塚者皆立  
方石以志其墓城都縣內有一方折石圍可六尺長  
三丈許去城北六十里曰毗橋亦有一折石亦如之  
長老傳言丁士擔土擔也公孫述時武擔石折故治  
中從事任文公歎曰噫西方智士死吾其應之歲中  
卒周顯王二十二年蜀侯使朝秦秦惠王數以姜女  
進蜀王感之故朝焉惠王知蜀王好色許嫁五女於  
蜀蜀遣五丁迎之還到梓潼見一大蛇入穴中一人

覽其尾掣之不禁至五人相助大呼掘蛇山崩時壓  
殺五人及秦五女并將從而山分爲五嶺直頂上有  
平石蜀王痛傷乃登之因命曰五婦冢山川平石上  
爲望婦塚作思妻臺今其山或名五丁冢蜀王別封  
弟葭萌於漢中號苴侯命其邑曰葭萌焉苴侯與巴  
王爲好巴與蜀讎故蜀王怒伐苴侯苴侯奔巴求救  
於秦秦惠王方欲謀楚羣臣議曰夫蜀西僻之國戎  
狄爲鄰不如伐之司馬錯中屠田真黃曰蜀有桀紂  
之亂其國富饒得其布帛金銀足給軍用水通於楚

有巴之勁卒浮大舶船以東向楚楚地可得得蜀則  
得楚楚亡則天下非矣惠王曰善周慎王五年秋秦  
大夫張儀司馬錯都尉墨等從石牛道伐蜀蜀王自  
於葭萌拒之敗績王遷走至武陽爲秦軍所害其傅  
相及太子退至逢鄉死於白鹿山開明氏遂亡凡王  
蜀十二世冬十月蜀平司馬錯等因取苴與巴焉周  
赧王元年秦惠王封子通國爲蜀侯以陳壯爲相置  
巴郡以張若爲蜀國守或伯尚強乃移秦民萬家實  
之三年分巴蜀置漢中郡六年陳壯反殺蜀侯通國

秦遣庶長甘茂張儀司馬錯復伐蜀誅陳壯七年封  
子惲爲蜀侯司馬錯率巴蜀衆十萬大舶舩萬艘米  
六百萬斛浮江伐楚取商於之地爲黔中郡五年惠  
王二十七年儀與若城成都周廻十二里高七丈郾  
城周廻七里高六丈臨邛城周廻六里高五丈造作  
下倉上皆有屋而置觀樓射圃成都縣本治赤里街  
若徙置少城內城營廣府全置鹽鐵市官并長丞修  
整里閭市張列肆與咸陽同制其築城取土去城十  
里因以養魚今萬歲池是也惠王二十七年也城北

又有龍壩池城東有千秋池城西有柳池冬夏不竭其園囿因之平陽山亦有池澤蜀之漁畋之地也報王十四年蜀侯惲祭山川獻饋於秦孝文王惲後母害其寵加毒以進王王將嘗之後母曰饋從二千里來當試之王與近臣近臣卽斃文王大怒遣司馬錯賜惲劍使自裁惲懼夫婦自殺秦誅其臣郎中令嬰等二十七人蜀人葬惲郭外十五年王封其子綰爲蜀侯十七年間惲無罪冤枉死使使喪入葬之郭內初則炎旱三月後又霖雨七月車溺不得行喪車至

城北門忽陷入地中蜀人因名北門曰咸陽門爲蜀侯惲立祠其神有靈能興雲致雨水旱禱之三十年疑蜀侯綰反王復誅之但置蜀守張若因取笮及其江南地焉周滅後秦孝文王以李冰爲蜀守冰能知天文地理謂汶山爲天彭門乃至湍及縣見兩山對如闕因號天彭闕髣髴若見神遂從水上立祀三所祭用三牲珪璧沈瀆漢典鼓使使者祭之冰乃壅江作湖穿郫沱檢江別支流雙過郡下以行舟船岷山多梓柏大竹頽隨水流坐致材木功省用饒又溉灌

三郡開稻田於是蜀沃野千里號爲陸海旱則引水  
浸潤雨則杜塞水門故記曰水旱從人不知饑饉時  
無荒年天下謂之天府也外作石犀五頭以厭水精  
穿石犀溪於江南命曰犀牛里後轉置犀牛二頭一  
在府市市橋門今所謂石牛門是也一在淵中乃自  
前堰上分穿羊摩江灌江西於玉女房下自涉郵作  
三石人立三水中與江神要水竭不至足盛不涸肩  
時青衣有洙水出蒙山下伏行地中會江南安觸山  
脇洞崖水脈漂疾破害舟船歷代患之冰發卒鑿平

涸崖通正水道或曰冰鑿崖時水神怒冰乃操刀入  
水中與神鬪至今蒙福棘道有故蜀王兵闌亦有神  
作大灘江中其崖嶮峻不可鑿乃積薪燒之故其處  
懸崖有赤白五色水又通笮通汶井江徑臨邛與蒙  
溪分水白木江會武陽天社山下合江又導洛通山  
洛水或出瀑口經什邡郫別江會新都大渡又有綿  
水出紫巖山經綿竹入洛東流過資中會江陽皆溉  
灌稻田膏潤稼穡是以蜀川人稱郫繁曰膏腴綿洛  
爲浸沃也又識齊水脈穿廣都鹽井諸陂池蜀於是

盛有養生之饒焉漢祖自漢中出三秦伐楚蕭何發  
蜀漢米萬斛而給助軍糧收其精銳以補傷疾雖王  
有巴蜀南中不賓也高祖六年始分置廣漢郡高后  
六年城夔道開青衣孝文帝末年以廬江文翁爲蜀  
守穿湔江口溉灌繁田千七百頃是時世平道治民  
物阜康承秦之後學校陵夷俗好文刻翁乃立學選  
吏子弟就學遣雋士張叔等十八人東詣博士受七  
經還以教授學徒鱗萃蜀學比於齊魯巴漢亦立文  
學孝景帝嘉之令天下郡國皆立文學因翁倡其教

蜀爲之始也孝武帝皆徵入叔爲博士叔明天文災  
異始作春秋章句官至侍中揚州刺史元光四年置  
蜀四部都尉元鼎二年立成都十八郭於是郡縣多  
城觀矣六年分廣漢置犍爲郡元封元年分犍爲置  
牂柯郡二年分牂柯置益州郡六年以廣漢西部蜀  
南郡爲越雋郡北部冉龐爲汶山郡邛笮爲沉黎郡  
合置二十餘縣天漢四年罷沉黎置兩部都尉一治  
旄牛主外羌一治青衣漢民孝宣帝地節三年罷汶  
山郡置北部都尉時又穿臨邛蒲江鹽井二十所增



置鹽鐵官蜀自漢興至於哀平皇德隆熙牧守仁明  
宣德立教風雅英偉之士命世挺生感於帝思於是  
璽書交馳於斜谷之南玉帛踐乎梁益之鄉而西秀  
彥盛或龍飛紫閣允陟璿璣或盤桓利居經綸皓素  
故司馬相如耀文上京楊子雲齊聖廣淵嚴君平經  
德秉哲王子淵才高名雋李仲元湛然岳立林翁孺  
訓誥玄遠何君公謨明弼諧王延世著勲河平其次  
楊壯何顯得意之徒恂恂焉斯益華岷之靈標江漢  
之精華也故益州刺史王褒悅之命王褒作中和頌

令胄子作鹿鳴聲歌之以上孝宣帝帝曰此盛德之  
事朕何以堪之卽拜爲郎降及建武以後爰迄靈獻  
文化彌純道德彌臻趙志伯三遷台衡子柔兄弟相  
繼元輔司空張公宜融皇極太常仲經爲天下材英  
廣陵太守張文紀號天下整理武陵太守杜伯持能  
決天下所疑王稚子震名華夏常茂尼流芳京尹其  
次張俊秦宓英辯博通董扶楊厚究知天文任定祖  
訓徒同風洙泗其孝悌則有姜詩感物寤靈禽堅精  
動殊俗隗通石橫中流吳順赤烏來巢其忠貞則王

皓隕身不傾朱遵絆馬必死王累懸頸州門張任守  
節故主其淑媛則有元常紀常程瑛及吳幾先絡耶  
之二姚殷氏兩女趙公夫人自時厥後龍宗有鱗鳳  
集有翼楮紳邵右之疇比肩而進世載其美是以四  
方述作有志者莫不仰其高風範其儀則擅名八區  
爲世師表矣其忠臣孝子烈士貞女不勝詠述雖魯  
之詠洙泗齊之禮稷下未足尚也故漢徵八士蜀有  
四焉然秦惠文始皇克定六國輒徙其豪俠於蜀資  
我豐土家有鹽銅之利戶專山川之材居給人足以

富相尚故工商致結駟連騎豪族服王侯美衣娶嫁  
設太牢之厨膳歸女有百兩之徒車送葬必高墳瓦  
棺無莫而羊豕夕牲贈襚兼加贈賻過禮此其所失  
原其由來染秦化故也若卓王孫家僮千數程鄭各  
八百人而邈公從禽巷無行人簫鼓歌吹擊鐘肆懸  
富侔公室豪過田文漢家食貨以爲稱首蓋亦池沃  
土豐奢侈不期而至也

蜀郡州治屬縣五戶漢廿七萬晉六萬五千去洛三  
千一百二十里東接廣漢北接汶山西接漢嘉犍爲

蜀志  
州治大城郡治少城西南兩江有七橋直西門郾江  
中冲治橋西南石牛門曰市橋下石犀所潛淵中也  
城南曰江橋南渡流曰萬里橋西上曰夷里橋上曰  
笮橋橋從冲治橋西出折曰長昇橋郾江上西有永  
平橋長老傳言李冰造七橋上應七星故世祖謂吳  
漢曰安軍宜在七星間城北十里有昇仙橋有送客  
觀司馬相如初入長安題市門曰不乘赤車駟馬不  
過汝下也其郾西上有永平橋於是江衆多作橋故  
蜀立里多以橋爲名按水經注冲  
治作冲里其大江自前堰下

至犍爲有五津始曰白華津二曰里津三曰江首津  
四曰涉頭津劉璋時召東州民居此改曰東州頭五  
曰江南津入犍 有漢安橋玉津東沮津津亦七始  
文翁立文學精舍講堂作石室一作玉室在城南永  
初後堂遇火太守陳留高暎朕更修立又增造二石室  
州奪郡文學爲州學郡更於夷里橋南岸道東邊起  
文學有女牆其道西城故錦官也錦江織錦濯其中  
則鮮明濯他江則不好故命曰錦里也西又有車官  
城其城東西南北皆有軍營壘城其郡四出大道道

實二十里有簡今言十八里者昔蜀王女未嫁年二十亡王哀悼不忍言二十故言十八也王女墓在城北今王女陌是也其太守著德垂績者前漢莫聞建武以來有第五倫廉范叔度特垂惠愛百姓歌之曰廉叔度來何暮來時我單衣去時重五袴其後漢中趙瑀自扶風太守來之郡司空張溫謂曰第五伯魚從蜀郡爲司空今掃吾第以待足下瑀與廣漢陳留高朕亦播文教太尉趙公初爲九卿適子甯還蜀朕命爲文學撰鄉俗記亦能屈士如此廣漢王商健爲

揚洪甘見詠懷及晉建西夷府太守多遷爲西夷校尉亦遷益州刺史口

成都縣郡治有十二鄉五部尉漢戶七萬晉三萬七千名難治時廣漢馮顛爲令而太守京兆劉宣不奉法令顛奏之立文學學徒八百人實戶口萬八千開稻田百頃治蹟尤異後有廣漢劉龐爲令大姓恣縱諸趙倚公故多犯法漢陽太守趙子真父子強橫龐治其罪莫不震肅耶民楊伯侯奢佞大起塚營因龐爲耶令伯侯遂徙占成都龐復爲成都豪右敬服有

蜀侯祠大姓有柳杜張趙郭楊氏豪富先有程鄭郭  
公後有郭子平奢豪楊伯侯兄弟 郫縣郡西北六  
十里冠冕大姓何羅郭氏 繁縣郡北九十里有泉  
水稻田三張爲甲族 江原縣郡西渡大江濱文井  
江去郡一百二十里有青城山稱江祠安漢上下朱  
邑出好麻黃潤細布有羌筒盛小亭有好稻田東方  
常氏爲大姓文井上有守提三十里上有天馬祠  
臨邛縣郡西南二百里本有邛民秦始皇從上郡實  
之有布濮水從布濮來合火井江有火井夜時光映

上昭民欲其火光以家火投之頃許如雷聲火焰出  
迴輝數十里以竹筒盛其光藏之可拽行終日不滅  
也井有二水取井火煮之一斛水得五斗鹽家火煮  
之得無幾也有古石山有石鑛大如蒜子火燒合之  
成流支鐵甚剛因置鐵官有鐵祖廟祠漢文帝時以  
鐵銅賜侍郎鄧通通假民卓王孫歲取千疋故王孫  
貨累巨萬億鄧通錢亦盡天下王孫女文君能鼓琴  
時有司馬長卿者臨邛令王吉與之遊王孫家文君  
曰奔長卿漢世縣民陳立歷巴郡將柯天水太守有

蜀志 十三  
異政陳氏劉氏爲天姓冠蓋也 廣都縣郡西三十里元朔二年置有鹽井漁田之饒大豪馮氏有魚池鹽井縣凡有小井十數所及魚田之饒江有魯漕梁山有鐵鑛江西有安稻田穿山崖過水二十里漢時縣民朱辰字元燕爲巴郡太守甚著德惠辰卒官郡獯民北送及慕獲蠶鼓刀辟踊感動路人於是葬所草木頃許皆做之曲折迄今蜀人莫不歎辰之德靈爲之感應今朱氏爲首族也成都市官本有長建武十八年省蜀郡太康初屬王國改號曰成都內史王

改封乃復舊

廣漢郡高帝六年置屬縣八漢戶十七萬晉四萬去洛三千里南去成都百二十里西接汶山北接梓潼東接巴郡本治繩鄉安帝永和中陰平漢中羌反元初二年移治後治雒城王莽改曰就都公孫述名曰子同益州以蜀郡廣漢犍爲三蜀土地沃美人士俊又爲一州稱益然漢選蜀郡廣漢太守每重德高俊故前有趙護第五伯魚後有蔡陳表章禮物殊於諸郡其太守著功德者有劉威孫賓蔡陳寵伯魚自郡

徑遷司徒寵亦至三公而後諷尹睦鮮于定趙瑤皆  
公望也薛鴻輩鄉佐也而許靖亦爲上公及何祗常  
閤皆有稱望以處州中益州恒治此郡初平中益州  
牧劉焉自綿竹移雒縣城築闕門云其地不王乃留  
孫修據之建安十八年劉先主自涪攻圍且一年軍  
師靡統中流矢死先主痛惜言則涕泣廣漢太守南  
陽張存曰統雖可惜違大雅之體先主怒曰統殺身  
成仁非仁者乎卽免存官十九年牧雒城援襄陽馬  
民書諸葛亮曰承雒縣已下尊兄配業先國鬼兆

見矣時州或治成都時復治雒爲蜀淵府 雒縣郡  
治沔鄉有孝子姜詩田地宅姓族有鐔李郭翟氏  
綿竹縣劉焉初所治綿與雒各出稻稼畝收三十斛  
有至十五斛漢時任安定祖以儒學教號侔涿泗有  
多士秦杜爲首族也 什邡縣山出好茶楊氏爲大  
姓美田有鹽井 新都縣蜀以城都廣都新都爲三  
都號名城有金堂山水通於巴漢時五倉名萬安倉  
有棗魚梁多名士有楊厚董扶又有四姓馬史汝鄭  
者也 五城縣郡東南有水通於巴漢時置五倉發

五縣民尉部主之後因以爲縣出龍骨云龍升其山  
值天門閉不達墮死於此後沒地中故掘取得龍骨  
鄴縣有山原田富國鹽井濮出好棗宜君山出麋  
尾特好入貢大姓王李氏又有高馬家世常部曲蜀  
時高勝馬泰皆叛伏誅 廣漢縣有山原田蜀時彭  
義有雋才晉世改號令德故二姓爲甲族也 德陽  
縣有青石祠山原肥沃有澤漁之利士女貞孝望山  
樂水土地易爲生事車騎將軍鄧芝雅有終焉之思  
後遂葬其山太守夏侯慕時古濮爲功曹康古袁氏

爲四姓大族之甲者也劉氏延熙中分廣漢四縣置  
東廣漢郡咸熙初省秦始末又分置新都郡太康省  
末年又置蜀王國蜀郡常璽爲內史永嘉末省  
犍爲郡孝武建元六年置時治犍縣十二漢戶十萬  
犍故犍爲地是也犍有犍山見保乾圖武帝初欲開  
南中令蜀通犍青衣道是元年犍道令通之費功無  
成百姓愁怨司馬相如諷諭之使者唐蒙將南入以  
道不通執令將斬之令歎曰忝官益土恨不見成都  
市蒙卽令送成都市而殺之蒙乃斬石通閣道故世



爲諺曰思都郵斬令頭云後蒙爲都尉治南夷道元  
光五年郡移治南廣四年益州刺史任安城武陽孝  
昭元年郡治夔道後徙武陽至晉屬縣五戶二萬  
去洛三千二百七十里東接江陽南接朱提北接蜀  
郡西接廣漢王喬升其北山彭祖家其彭蒙白虎仁  
於廣德寶鼎見於江漑緩和五年又上寶磬十六劉  
向以爲美化所降用立辟雍而士多仁孝女姓貞專  
王莽改曰西順郡人不會更始都南陽遠奉貢職及  
公孫述有蜀郡拒守述伐之郡功曹朱遵逆戰衆寡

不敵遵絆馬死戰遂爲述所并而任君業閉戶費貽  
素隱光武帝嘉之曰士大夫之郡也郡去成都百五  
十里渡大江昔人作大橋曰漢安橋廣一里半每秋  
夏水盛斷絕歲歲修理百姓苦之建安二十一年太  
守南陽李嚴乃鑿天社山導江通車道省橋梁三津  
吏民悅之嚴因更造起府寺觀壯麗爲一州勝宇二  
十四年黃龍見武陽赤水九月蜀以劉氏瑞應其太  
守漢興以來鮮有顯者 武陽縣郡治有王喬彭祖  
祠蒲江大堰灌郡下六門有朱遵祠山出鐵及白玉

劉昭注有

特多大姓有七陽五李諸姓十二也 南安縣郡東  
 四百里治青衣江會縣溉有名灘一日雷垣二日鹽  
 概李冰所平也有柑橘官社漢有鹽井南安武陽皆  
 出名茶多陂池西有熊耳南有峨眉山山去縣八十  
 里孔子地圖言有仙藥漢武帝遣使者祭之欲致其  
 藥不能得有四姓能宣謝審五大族揚費又有信士  
 呂孟貞紀至行也 犍道縣在南安東四百里拒郡  
 百里高后六年城之治焉湖江會水通越雋本有犍  
 人故秦紀言犍童之富漢民多漸斥徙之有荔支薑

犍濱江有兵欄

後漢書注引本志云有玉兵蘭挺兵欄

李冰燒之崖有

五色赤白映水玄黃魚從楚來至此而止畏崖映水

也有韓原素嗣又有孝子隗通為母汲江齋水天為

出平石生江中今石在馬湖江而孝子吳順養母赤

鳥巢其門崩容江出好磨石崩江多魚民失在於徵

巫好鬼妖大姓吳隗又有楚石薛相者 牛鞞縣受

新都江去郡三百里元鼎二年置相陽明鹽井程韓

氏為冠蓋之族資中縣受牛鞞江也

江陽郡先有王延世著勳河平後有董鈞為漢定禮

王董張趙爲四族二縣在中多山田少種稻之地本  
隸爲枝江都尉建安十八年置郡漢安程徵石謙白  
州牧劉璋求立郡璋聽之以都尉廣漢成存爲太守  
屬縣四戶五千去洛四千八十里東接巴郡南接牂  
柯西接廣漢隸爲北接廣漢有荔支巴菽桃枝蒟蒻給  
橙俗好文刻少儒學多樸野蓋天性也 江陽縣郡  
沿江雜會有方山蘭祠江中有大關小關季春黃龍  
堆沒關即平昔云世祖微時過江陽有一子望氣者  
曰江陽有貴兒氣王莽求之縣人殺之後世祖爲子

立祠謫江陽民不使冠帶者數世有富義鹽井又郡

下百二十里者曰伯塗魚梁六伯氏女爲塗氏婦梁

四姓王孫程鄭八族又有魏趙先周也有荔支巴菽  
桃枝蒟蒻給橙

字與上文已志序所  
稱葉莢名大同小異 漢安縣郡東五百里土地雖

迫山水特美好宜蠶桑有鹽井魚池以百數家家有

焉一郡豐沃四姓程石姚郭八族張季李趙權而程

石傑立郡常乘議論選之 符縣郡東二百里元鼎

二年置治安樂水會東接巴蜀樂城南水通平差營

縣永建元年十二月縣長趙祉遣吏先尼和拜檄巴

蜀守過成瑞灘死子賢求喪不得女絡年二十五廼  
 分金珠作二錦囊繫兒頭下至二年二月十五日女  
 絡乃乘小船至父沒所哀哭自沈見夢告賢曰至二  
 十一日與父屍俱出至日父子浮出縣言郡太守蕭  
 登高之上尚書遣戶曹掾為之立碑人為語曰符有  
 先絡熒道張帛求其人天下無有其偶者矣按熒道黃帛張  
貞妻也沈身求貞事頗類此語乃新樂縣郡西二百八十里元康  
 五年置西楚熒道有鹽井大姓魏呂氏  
 汶山郡本屬郡北部冉駹都尉孝武元封四年置舊

屬縣八戶二十五萬去洛三千四百六十三里東接  
 蜀郡南接漢嘉西接梁州酒泉北接陰平有六夷羌  
 胡羗虜白蘭蚶九種之戎牛馬旄氈班斲青頓羗氍  
 手毳之屬特多雜藥名香土地剛鹵不宜五穀惟種  
 麥而多水寒盛夏凝凍不釋故夷人冬則避寒入蜀  
 庸貨白食夏則避暑反落歲以為常故蜀人謂之作  
 五百石子也宣帝地節元年武都白馬羗反使者駱  
 武平之因拜越備太守迎者如雲後蜀郡趙溫亦著  
 治績故王莽遣任貴為鎮戍大尹守之自建武後數

當是也

蜀志

二十一

叛章武三年越雋叟雋安大師高定元稱王恣睢遣都督  
李承之殺將軍梓潼隗瑣破沒郡土丞相亮遣越雋  
太守龔祿住安上縣遙領太守安上去郡八百里有  
名而已建興三年蜀安南將軍馬忠率越雋郡夷郡  
夷剛狼皆賜視忠卒越雋太守張嶷將所領之郡誘  
殺蘇祈邑君冬逢及其弟隗臬等懷集種落威信允  
著諸種漸服又斬斯都耆師李承之首及手殺隗瑣  
龔祿者也又討叛鄙降夷人安種落蠻夷率服嶷始  
以郡郭宇頽更築小塢居之舊本記此段說舛不可  
重叙姑考事之本未畧

加整頓

延熙二年乃還舊郡更城郡城夷人男女莫

不致力興復七縣嶷遷復後頗奸宄雖有四部斯兒  
及七管軍不足固守乃置赤甲北軍二牙門及斯兒  
督軍中堅衛夷徼 邛都縣郡治因邛邑名也邛之  
初有七部後爲七部管軍又有四部斯兒南山出銅  
有溫泉穴冬夏熱其溫可湯鷄豚下流治疾病餘多  
惡水水神護之不可污穢及沈亂矣照回則使人被  
惡疾一郡通云然 臺登縣有孫水一曰白沙江入  
馬湖水山有磐石火燒成鐵剛利禹貢厥賦磐是也

又有漆漢末夷皆有之疑取焉張焜也 閬縣故邛人

邑邛都接寒關今省 蘇示縣漢末夷王及弟隗渠

數偕叛以服諸種張焜先殺王弟隗渠又叛遁入西

徼遣親信二人使焜焜知姦計以重賂使使殺渠渠

死夷徼肅清縣晉省 會無縣路通寧州渡瀘得住

狼縣故濮人邑也今有濮人冢冢不閉戶其穴多有

碧珠人不可取取之不祥有天馬河馬日千里後死

於蜀葬江原小亭今天馬冢是也縣有天馬祠初民

家馬牧山下或產駿駒云天馬子也今其天馬逕厥

劉昭注作東山出青碧  
而漢書曰但作大注

水經注作昆陽

劉昭注

迹存焉河中有銅船今以羊祀之可取河中見存土

地時產犀牛東山色青碧後漢書註引大竿縣漢末

省也 定筰縣筰竿夷也汶山曰夷南中曰昆明漢

嘉越舊曰筰蜀曰邛皆夷種也縣在郡西渡瀘水賓

剛徼白摩沙夷有鹽池積薪以齊水灌而後焚之成

鹽漢末夷皆錮之張焜往爭夷帥岑槃木明不肯服

焜禽撻殺之厚賞賜餘類皆安官迄有之北沙河是

三縫縣一曰小會無音三播音三播道寧州渡

瀘得蜻蛉縣有長谷石時平中有石豬子母數千頭

長老傳言夷昔牧豬於此一朝豬化為石迄今夷不敢往牧 卑水縣去郡三百里水流過馬湖 潛溪縣漢末置晉初省 安上縣 馬湖縣水通夔道人江晉初省 右益州漢初統郡五後漸分建蜀郡及巴郡又分爲五郡廣漢漢中犍爲爲四郡又開益州五郡合二十五郡又寧州梁州建復增七郡蜀於是右州四十二郡一百九十六縣州州分後益州凡新舊郡九縣四十八戶夷晉二十四萬

撰曰蜀之爲邦天文井絡輝其上地理岷嶓鎮其域

五岳華山表其陽四瀆明汶江出其微故上聖則大禹生其鄉媾姻則黃帝婚其女顯族大賢彭祖育其山列仙王喬升其岡而寶鼎輝光於中流驪龍仁虎躍乎淵陵開闢及漢國富民殷府腐穀帛家蘊畜積雅頌之聲充塞天衢中穆之詠侔乎二南蕃衍三州土廣萬里方之九區於斯爲盛固乾坤之靈囿先王之所經緯也

蜀志終

蜀志

南中志

晉 常璩著 吳郡汪明際閱

寧州晉泰始六年初置蜀之南中諸郡庾亮降都督治也南中在昔蓋夷越之地滇濮句町夜郎葉榆桐師  
葛唐侯王國以十數編髮左衽隨裔遷徙莫能相雄  
長 下詠昌縣 周之季世楚威王遣將軍莊躋泝沅水  
有葛唐縣 出且蘭以伐夜郎植牂牁繫船於是且蘭旣尅夜郎  
又降而秦奪楚黔中地無路得反遂留王滇池躋楚  
莊王苗裔也以繫船因名且蘭為牂牁國分侯支黨

當作柯下同

南中志



傳數百年秦并蜀通五尺道置吏主之漢興遂不賓  
有竹王者興於遯水有一女子浣於水濱有三節大  
竹流入女子足間推之不肯去聞有兒聲取持歸破  
之得一男兒長養有才武遂雄夷狄以竹爲姓捐所  
破竹於野成竹林今竹王祠竹林是也王與從人嘗  
止大石上命作羹從者曰無水王以劍擊石水出今  
王水是也破石存焉後漸驕恣武帝使張騫至大夏  
國見邛竹蜀布問所從來曰吾賈人從身毒國得之  
身毒國蜀之西國今永昌是也騫以白帝東越攻南

越大行王恢救之恢使番陽令唐蒙曉喻南越南越  
人食有蒟醬蒙問所從曰牂牁來蒙亦以白帝因上  
書曰南越地東西萬里名爲外臣實一州主今以長  
沙豫章往水道多絕難行竊聞夜郎精兵可得十萬  
若從番禺浮船牂牁出其不意此制越之一奇也可  
通得夜郎道爲置吏主之帝乃拜蒙中郎將巴蜀兵  
千人奉幣帛見夜郎候喻以威德爲置吏旁小邑皆  
貪漢繒帛以爲道遠漢終不能有也故皆且聽命司  
馬相如亦言西戎邛笮蜀之後國可置爲郡帝旣感

邛竹又甘蒟醬乃拜為中郎將往喻意皆聽命後西  
 南夷數反發運興役費甚多相如知其不易也乃假  
 巴蜀之論以諷帝且以宣指便於百姓檄文在卒開  
 焚門通南中相如持節開越嵩按道侯韓說開益州  
 武帝傳拜唐蒙為都尉開牂牁以重幣喻告諸種侯  
 王侯王服從因斬竹王置牂牁郡以吳霸為太守及  
 置越嵩朱提益州四郡後夷濮阻城咸怨訴竹王非  
 血氣所生求立後嗣霸表封其三子列侯死配食父  
 祠今竹王三郎神是也昭帝始元元年益州廉頭姑

繒等二十四縣民反水衡都尉呂破奴募吏民及發  
 犍為蜀郡奔命擊破之後三歲姑繒復反都尉呂辟  
 辟胡擊之敗績明年遣大鴻臚田廣明等大破之斬  
 首捕虜五萬人獲畜產十萬餘頭富埒中國封其渠  
 帥亡波為句町王以助擊反者故也廣明賜爵邑成  
 帝時夜郎王興與句町王禹漏卧侯俞更相攻擊帝  
 使太中大夫張卬持節和解之句町夜郎王不服乃  
 刻木作漢使射之大將軍王鳳薦金城司馬蜀郡陳  
 立為牂牁太守何霸為中郎將出益州立既到郡單

至夜郎召興與與邑君數千人來見立立責數斬興  
 邑君皆悅服興與妻父翁指與興子耻復反立討之威  
 震南裔平帝末梓潼文齊為益州太守公孫述時拒  
 郡不服光武稱帝以南中有義按漢書述據益土齊  
子許以封侯終不降開光武即益州西部金銀寶貨  
位間道遣問蜀平封齊成義侯  
 之地居其官者皆富及十世孝明帝初廣漢鄭純獨  
 尚清廉毫毛不犯夷漢歌詠表薦無數上自三司下  
 及鄉士莫不歎賞明帝嘉之因以為永昌郡拜純太  
 守章帝時蜀郡王阜為益州太守治化尤異神馬四

匹出滇池河中甘露降白鳥見始興文學漸遷其俗  
 安帝永初中漢中陰平廣漢羌反征戰連年元初四  
 年益州永昌越嵩諸夷封離等反眾十餘萬多所殘  
 破益州刺史張喬遣從事蜀郡楊竦將兵討之竦先  
 以詔書告喻告喻不從方略滌討凡殺虜三萬餘人  
 獲生口千五百人財物四十餘萬降赦夷三十六種  
 舉劾姦貪長吏九十人黃綬六十人諸郡皆平竦以  
 傷死故功不錄自是後少寧五十餘年迄靈帝熹平  
 中蠻夷復反擁沒益州太守雍陟遣御史中丞朱龜

將并涼勁兵討之不克朝議不能征欲依朱崔故事  
棄之太尉掾巴郡李顥獻陳方策以爲可討帝乃拜  
顥益州太守與刺史龐芝伐之徵龜還顥將巴郡板  
楯軍討之皆破陟得生出後復更叛梓潼景毅爲益  
州太守承喪亂後民夷困餓米一斗千錢皆離散毅  
至安集後米一斗八錢建安十九年劉先主定蜀以  
鄧方治南昌夷漢敬其威信方爲先主問代於治中  
從事建寧李恢對曰西零之役趙充國有言莫若老  
臣先主遂用恢爲都督治平夷縣先主薨後越雋叟

帥高定元殺郡將軍隗璜舉郡稱王以叛益州大姓  
雍闓亦殺太守正昂更以蜀郡張裔爲太守闓假鬼  
教曰張裔府君如瓠壺外雖澤而內實粗殺之不可  
令縛與吳於是執送裔於吳吳王孫權遙用闓爲永  
昌太守遣故劉璋子闓爲益州刺史處交益州際牂  
牁郡丞朱提朱褒領太守恣睢丞相諸葛亮以初遭  
大喪未便加兵遣越雋太守巴西龔祿住安上縣遙  
領郡從事蜀郡常順行部南人以都護李嚴書曉喻  
闓闓荅曰愚聞天無二日土無二主今天下派分正

朔有三遠人惶惑不知所歸其傲慢如此願至牂牁收郡主簿考訊姦褒因然願爲亂益州夷復不從閩閩使建寧孟獲說夷叟曰官欲得烏狗三百頭膺前盡黑螭腦三斗斫木構三丈者三千枚汝能得不夷以爲然皆從閩斫木堅剛性委曲高不至二丈故獲以欺夷建興三年春亮南征自安上由水路入越嶲別遣馬忠伐牂牁李恢向益州以犍爲太守廣漢王士爲益州太守高定元自旄牛定笮卑水多爲壘守亮欲俟定元軍衆集合并討之軍卑水定元部曲殺

雍閩及士庶等孟獲伐閩爲主亮旣斬定元而馬忠欲釋牂牁李恢敗於南中夏五月亮渡瀘進征益州生虜孟獲置軍中閩口我軍如何獲對曰恨不相知公易勝耳亮以方務在北而南中好叛亂宜窮其詐乃赦獲使還合軍更戰凡七虜七赦獲等心服夷漢亦思及善亮復問獲獲對曰明公天威也邊民長不爲惡矣秋述平四郡改益州爲建寧以李恢爲太守加安漢將軍領交州刺史移治味縣分建寧越嶲置雲南郡以呂凱爲太守又分建寧牂牁置興古郡以馬

忠爲牂牁太守移南中勁卒青羗萬餘家於蜀爲五部所當無前號爲飛軍分其羸弱配大姓焦雍婁爨孟量毛李爲部曲置五部都尉號五子故南人言四姓五子也以夷多剛狠不賓大姓富豪乃勸令出金帛聘策惡夷爲家部曲得多者奕世襲官於是夷人貪貨物以漸服屬於漢成夷漢部曲亮收其俊傑建寧爨習朱提孟琰及獲爲官屬習官至領軍琰輔漢將軍獲御史中丞出其金銀丹漆耕牛戰馬給軍國之用都督常重用人李恢卒後以蜀郡太守韃爲張

翼爲都督翼特嚴法不得殊俗和夷帥劉胄反徵翼以馬忠爲代忠未至翼修功戰方各資儲羣下懼翼曰吾方臨戰場豈可以紬退之故廢公家之務乎忠至承以滅胄蜀賜翼爵關內侯忠在南柔遠能通甚垂惠愛官至鎮南大將軍卒後南人爲之立祠水旱禱之以蜀郡張表爲代加安南將軍又以韃爲楊義爲參軍副貳之表後以南郡閻宇爲都督南郡霍弋爲參軍弋甚善叅毗之禮遂代宇爲監軍安南將軍撫和異俗爲之立法施教輕重允當夷晉安之及晉

世因仍其任時交趾不附假弋節遙領交州刺史得  
以便宜選用長吏令官和解夷人及適罰之皆依弋  
故事弋卒子在龔領其兵和諸姓晉以巴西太守吳  
靜在官數年撫卹失和軍司鮮于嬰表徵靜還嬰因  
代之泰始六年以益州大分南中四郡爲寧州嬰爲  
刺史咸寧五年尚書令衛瓘奏兼并州郡太康三年  
罷寧州置南夷以天水李毅爲校尉持節統兵鎮南  
中統五十八部夷族都監行事每夷供貢南夷府入  
牛金海馬動以萬計皆豫作忿恚致校尉官屬其供

郡縣亦然南人以爲饒自四姓子弟仕進必先經都  
蓋夷人大種曰昆小種曰叟皆曲頭木耳環鐵裹結  
無大侯王如汶山漢嘉夷也夷中有桀黠能言議屈  
服種人者謂之耆老使爲主論議好譬喻物謂之夷  
經今南人言論雖學者亦半引夷經與夷爲姓曰遑  
耶諸姓爲自有耶世亂犯法輒依之藏匿或曰有爲  
官所法夷或爲執仇與夷至厚者謂之百世遑耶恩  
若骨肉爲其逋逃之藪故南人輕爲禍變恃此也其  
俗徵巫鬼好詛盟投石結草官常以盟詛要之諸葛

亮乃爲夷作圖譜先畫天地日月君長城府次畫神龍龍生夷及牛馬羊後畫部主吏乘馬幡蓋巡行安郵又畫牽牛負酒齋金寶詣之之象以賜夷夷甚重之許致生口直又與瑞錦鐵券今皆存每刺史校尉至齋以呈詣動亦如之毅後永昌呂祥爲校尉祥後數人李廣漢從雲南犍爲郡守爲校尉久之建寧太守巴西杜俊朱提太守梓潼雍約懦純無治政以賄成俊奪大姓鐵官令毛詵中郎李督部曲致詵弟耐罪朱提大姓太中大夫李猛有才幹弟爲功曹分當

察舉而俊約受都尉雷逢賂舉逢子焯孝廉不禮猛猛等怨之大安元年秋詵督猛逐俊以叛猛遺之書曰昔魯侯失道季氏出之天之愛民君師所治知足下追踵古人見賢思齊足下箕帚枉慚吾郡亦逐約應之作亂衆數萬毅討破之斬詵首督走依邊耶五茶夷帥于陵承猛箋降曰生長遐荒不達禮教徒與李雄和光合勢雖不能營師五丈略地涓濱冀北斷褒斜東據永安退考靈符晉德長久誠非狂夫所能下輒表革面歸罪有司殺惡其言遂誘殺之行部丞



昌從事江陽孫辨上南中形勢七郡斗絕晉弱夷強  
加其土人屈寒應復寧州以相鎮慰冬十一月丙戌  
詔書復置寧州增統牂牁益州朱提合七郡爲刺史  
加龍驤將軍進封成都縣侯二年于陵承詣毅請恕  
督罪毅許之督至羣下以爲誅督破亂州土必殺之  
毅不得已許諾及死督于陵承及誅猛追耶怒扇動  
謀反奉建寧太守巴西馬恢爲刺史燒郡僞發毅方  
疾作力出軍初以救恢及聞其情乃殺恢夷愈強盛  
破壞郡縣役吏民會毅疾甚軍連不利晉民或入交

州或入永昌牂牁半亦爲夷所困虜夷因攻圍州城  
毅但併力固孤城病篤不能戰討時李特李雄作亂  
益州而所在有事救援莫致毅上疏陳謝不能式遯  
寇虐疾與事遇使虜遊寇兵穀旣單器械窮盡而求  
救無望坐待殄斃若必不垂矜憂乞請大使及臣尚  
存加臣重罪若臣已死陳屍爲戮光熙元年春三月  
毅薨子釗任洛還赴到牂牁路塞停住交州文武以  
毅女秀明達有父才遂奉領州事秀初適漢嘉太守  
廣漢王載載將家避地在南故共推之又以載領南

南中志  
夷龍驤參軍秀獎厲戰討食糧已盡人但茹草炙鼠  
爲命秀伺夷怠緩輒出軍掩破首尾三年釗乃得達  
丁喪文武復逼釗領州府事殺故吏毛孟等詣洛求  
救至欲自刎懷帝乃下交州使救助之以釗爲平寇  
將軍領南夷護軍遣御史趙濤贈毅少府謚曰威侯  
交州刺史吾彥遣子威遠將軍咨以援之朝廷以廣  
漢太守魏興王遜爲南夷校尉寧州刺史代毅自永  
嘉元年受除四年乃至遜舉建寧董敏爲秀才郡久  
無太守功曹周悅行郡事輕敏不下其板遜至怒殺

悅悅弟秦臧長周昺合夷夷謀以趙濤父混昔爲建  
寧有德惠欲殺遜樹濤遜誅之并殺濤夷晉莫不惶  
懼表釗爲朱提太守治南廣禦雄時荒亂後倉無斗  
粟衆無一旅官民虛竭繩紀弛廢遜惡衣菜食招集  
夷民夷徼厭亂漸亦返善勞來不怠數年克復以五  
茶夷昔爲亂首圖討之未有致罪會夷發夜郎莊王  
慕遜因此遂討滅之及討惡僚剛夷數千落成震南  
方官至平西安南將軍又兼益州刺史加散騎常侍  
封褒中伯而嚴猛太過多所誅鋤健爲太守朱提雷

南中志 十一  
紹流民陰貢平樂太守董霸破牂牁平夷南廣北降  
李雄建寧襲量與益州太守李邊梁水太守董懂保  
興古槃以南叛雄遣叔父驥破越雋伐寧州遜使使  
督護雲南姚岳距驥於螳螂縣違遜指授雖大破驥  
不獲太興四年遜發病薨州人推中子堅領州事永  
昌元年晉朝更用零陵太守南陽尹奉爲寧州刺史  
南夷校尉加安西將軍奉威刑緩鈍政治不理咸和  
八年遂爲雄弟壽所破獲南中盡爲雄所有惟牂牁  
謝恕不爲壽所用遂保郡獨爲晉官至撫夷中郎將

寧州刺史冠軍是歲咸和八年也

牂牁郡漢武帝元鼎二年開屬縣漢十七戶六萬及  
晉縣四戶五千去洛五千六百一十里郡上值天井  
故多雨僚俗好鬼巫多禁忌畝山爲田無蠶桑頗尚  
學書少威儀多懦怯寡畜產雖有僮僕方諸郡爲貧  
王莽更名牂牁曰同亭郡不服會公孫述時三蜀大  
姓龍傳尹董氏與功曹謝暹保郡聞漢世祖在河北  
乃遣使使由番禺江出奉貢漢朝世祖嘉之號爲義  
郎明章之世母歛人尹珍字道真以生遐裔未漸庠

序乃遠從汝南許叔重受五經又師事應世叔學圖  
緯通三材還以教授於是南域始有學焉珍以經術  
選用歷尚書丞郎荊州刺史而世叔為司隸校尉師  
生並顯平夷傳寶夜郎尹貢亦有名德歷尚書郎長  
安令巴郡太守彭城相號南州人士郡特多阻嶮有  
延江霧赤煎水為池衛少有亂惟朱褒見誌其郡守  
垂功名者前有吳霸陳立後有漢中張亮則廣漢劉  
寵犍為費詩巴西馬忠皆著勲烈晉元帝世太守建  
寧孟才以驍果無恩郡民王清范期逐出之刺史王

遜怒分營牛為平夷郡夜郎以南為夜郎郡四縣

萬壽縣郡治有萬壽山沮本有鹽井漢末時夷民共

沮盟不開今三郡皆無鹽 且蘭縣音沮漢曰故且

蘭有杜蒲關也 按地道記 廣談縣毋歛縣有剛火

也

平夷郡晉元帝建興元年置屬縣二千戶 平夷縣

郡治有桃津安樂水山出茶蜜 營縣故犍為郡城

也不復山出營水入沅有野生薜可食大姓王氏

夜郎郡夜郎國也屬縣二千戶 夜郎縣郡治有遜

水通廣鬱林有竹王三郎祠甚有靈響 談指縣

漢

書談指縣出丹注云有不津江江有瘴氣

晉寧郡本益州也元鼎初屬牂柯越雋漢武帝元封二年叟反遣將軍郭昌討平之因開為郡治滇池上號曰益州漢屬縣二十四戶二十萬晉縣七戶萬去洛五千六百里司馬相如韓說初開得牛馬羊屬三十萬漢乃募徙死罪及奸豪實之郡土大平敞原田多長松臯有鸚鵡孔雀鹽池田漁之饒金銀畜產之富俗奢豪難撫御惟文齊王阜景毅李願及南郡董

和為之防檢後遂為善蜀建興三年丞相亮之南征以郡民李恢為太守改曰建寧治味縣寧州別建為益州郡後太守李暹恢孫也與前太守董愷建寧麩暹共叛寧州刺史王遜表改益州為晉寧郡 滇池縣郡治故滇國也有澤水周廻二百里所出深廣下流淺狹如倒流故曰滇池長老傳言池中有神馬或交焉即生駿駒俗稱之曰滇池駒日行五百里水神祠祀亦有溫泉如越雋温水又有白蜩山山無石惟有蜩也 同勞將 同安縣 連然縣有鹽泉南中

共仰之 建伶縣 毋單縣 秦臧縣

建寧郡治故康降都督屯也南人謂之屯下屬縣晉

太安二年分爲益州平樂二郡合縣十三戶萬去洛

五千六百三十九里有五部都尉四姓及霍家部曲

味縣郡治有明月社夷晉不奉官則官與共盟於

此社也 升麻縣山出好升麻有塗水 按漢書爲牧靡李奇曰靡

音麻晉書建寧郡有牧靡 同樂縣大姓襄氏 穀昌縣漢武帝

將軍郭昌討夷平之因名郭昌以威夷孝章時改爲

穀昌也 同瀨縣 按漢書地道記曰瀨山米水所出 雙栢縣 存

驪縣雍閩反結壘於縣山繫馬柳柱生成林今夷言

無雍梁夷言馬也 昆澤縣 漏江縣九十里出蠙

口 談彙縣有濮獠 冷丘縣有主獠 修雲縣

新定縣

平樂郡元帝建興元年刺史割建寧新定興遷二縣

新立平樂三沮二縣合四縣爲郡後太守建寧董霸

叛降李雄郡縣遂省寧州北屬雄復爲郡以朱提李

壯爲太守朱提郡本犍爲南部孝武帝元封二年置

屬縣四建武後省爲犍爲屬國至建安二十年鄧方

爲都尉先主因易名太守屬縣五戶八千去洛五千三百里先有梓潼文齊初爲屬國穿龍池溉稻田爲民興利亦爲立祠大姓朱魯雷興仇遜高李亦有部曲其民好學濱犍爲號多士人爲寧州冠冕 朱提縣郡治 螳螂縣因山名也出銀鉛白銅雜藥有螳螂附子 南秦縣自夔道南廣有八亭道通平夷漢陽縣有漢水延江 南昌縣故都督治有鄧安遠城也

南廣郡蜀延熙中置以蜀郡常竺爲太守蜀朝召竺入爲侍中巴西令狐衷代之建武九年省元帝世刺史王遜移朱提治郡南廣太守李釗數破雄殺賊大將樂初後刺史尹奉却郡還舊治及雄定寧州復置郡以興古太守朱提李播爲太守屬縣四戶千自夔道至未提有水步道水道有黑水及羊官水至險難行步道度三津亦艱阻故行人爲語曰猶溪赤木盤地七曲盤羊烏樞氣與天通看都濩泚住柱呼尹康降賈子左僭七里又有牛叩頭馬搏坂其險如此土地無稻田蠶桑多地蝱虎狼俗妖巫惑禁忌多神祠

南廣縣郡治漢武帝太初元年置有鹽官 臨利

縣 常遷縣 新興縣

永昌郡古哀牢國哀牢山名也其先有一婦人名曰

沙壺

後漢作沙壺

依哀牢山下居以捕魚自給忽於水中

觸一沈木遂感而有娠度十月產子男十人後沈木

化爲龍出謂沙壺曰君爲我生子今在乎而九子驚

走惟一小子不能去陪龍坐龍就而舐之沙壺與言

語以龍與陪坐因名曰元隆猶漢言陪坐也沙壺將

元隆居龍山下元隆長大才武後九兄曰元隆能與

龍言而黠有智天所貴也共推以爲王時哀牢山下

復有一夫一婦產十女元隆兄弟妻之由是始有人

民皆象之衣後着十尾臂脛刻文元隆死世世相繼

分置小王往往邑居散在溪谷絕域荒外山川阻深

生民以來未嘗通中國也南中昆明祖之故諸葛爲

其國譜也孝武時通博南山度蘭滄水清溪置嶠唐

不韋二縣徙南越相呂嘉子孫宗族實之因名不韋

以彰其先人惡行人歌之曰漢德廣開不賓渡博南

越蘭津渡蘭滄爲他人渡蘭滄水以取哀牢地哀牢



轉衰至世祖建武二十三年王扈栗後漢作賢栗遣兵乘

箄船南攻鹿麋鹿麋民弱小將為所擒會天大震雷

疾風暴雨水為逆流箄船沈沒溺死者數千人後扈

栗復遣六王攻鹿麋鹿麋王迎戰大破哀牢軍殺其

六王哀牢人埋六王夜虎掘而食之哀牢人驚怖引

去扈栗懼謂諸耆老曰哀牢畧徼自古以來初不如

此今攻鹿麋輒被天誅中國有受命之王乎是何天

祐之明也漢威甚神即遣使詣越雋太守願帥種人

歸義奉貢世祖納之以為西部屬國其地東西三千

里南北四千六百里有穿胷儋耳種閩越濮鳩獠其

渠帥皆曰王孝明帝永平十二年哀牢押狼遣子奉

獻明帝乃置郡以蜀郡鄭純為太守屬縣八戶六萬

去洛六千九百里寧州之極西南也有閩濮鳩獠獠

越躒濮身毒之民土地沃腴黃金珠虎魄翡翠孔

雀犀象蠶桑綿絹采帛文繡又有貊獸食鐵猩猩獸

能言其血可以染朱罽有大竹名濮竹節相去一丈

受一斛許有梧桐木其花柔如絲民績以為布幅廣

五尺潔白不受污俗名曰桐華布以覆亡人然後服

之乃賣與人有蘭干細布蘭干獠言紵也織成文如綾錦又有蜀旄帛疊水精瑠璃軻蟲蚌珠宜五穀出出銅錫太守著名績者自鄭純後有蜀郡張化常員巴郡沈稚黎彪然顯者猶鮮章武初郡無太守值諸郡叛亂功曹呂凱奉郡丞蜀郡王伉保境六年丞相亮南征高其義表曰不意永昌風俗乃爾以凱爲雲南太守伉爲永昌太守皆封亭侯李恢遷濮民數千落于雲南建寧界以實二郡凱子祥太康中獻光珠五百斤還臨本郡遷南夷校尉祥子元康末爲永昌

太守值南夷作亂閩濮反乃南移永壽去故郡千里遂與州隔絕呂氏世官領郡於今三世矣大姓陳趙謝楊氏 不韋縣故郡治 北蘇縣 哀牢縣 永壽縣今郡治 嵩唐縣有周水從徼外來 雍鄉縣南里縣有翡翠孔雀 博南縣西山高四十里越之得蘭滄水有金沙以火融之爲黃金有光珠穴出光珠有虎魄能吸芥又有珊瑚

雲南郡蜀建興三年置屬縣七戶萬去洛六千三百四十三里本雲川地有熊倉山上有神鹿一身兩頭

食毒草有上方下方夷亦出華布孔雀常以二月來  
翔月餘而去土地有稻田畜牧但不蠶桑 雲南縣

郡治 葉榆縣有河洲 遂久縣有繩水 按廣志曰有縹碧石

碧 有緣 枿棟縣有無血水水出連山 蜻蛉縣有鹽

官濮水同出山有碧雞金馬光影倏忽民多見之有  
山神漢宣帝遣諫議大夫蜀郡王褒祭之欲致雞馬

褒道病卒故不宜著 其縣二別為郡

河陽郡刺史王遜分雲南置蜀縣四戶千 河陽縣

郡治在河中源州上

梁水郡刺史王遜分置在與古之盤南 梁水縣郡

治有振山出銅 賁古縣采山出銀鉛銅鐵 西隨

縣 按地道記曰糜水西受微外東至糜冷水斷龍雞

與古郡建興三年置屬縣十一戶四萬去洛五千八

百九十里多鳩獠濮特有瘴氣自梁水與古西平三

郡少穀有枕榔木可以作麵以牛酥酪食之人民資

以為糧欲取其木先當祠祀 温縣郡治元陽二年

置 律高縣西有石空山出錫東南有隘町山出錫

律封縣有温水 旬町縣故旬町王國名也其置

南中志 卷之九

自漢王姓母漢時受封迄今 漢興縣 勝休縣有

河水也

一本云河水從廣百四十里深數十里  
丈地道記曰水東至母撥入橋水

唐都

縣故名雲夢縣

西平郡刺史王遜時夔量保盤南遜出軍攻討不能  
克及遜薨後寇掠州下吏民患之刺史尹奉重募徼  
外夷刺殺量而誘降李暹盤南平奉以功進安西將  
軍封遷陵伯乃割興古雲南之盤江南如南零三縣  
為郡 右寧州統郡十四縣六十八

咸熙元年吳交趾郡吏呂興殺太守孫靖內附魏魏

拜興安南將軍時南中監軍霍弋表遣建寧夔谷為  
交趾太守率牙門將軍建寧董元毛吳孟幹孟通夔  
熊李松王素等領部曲以討之谷未至興已為功曹  
李統所殺泰始元年谷等徑至郡撫和初附無幾谷  
卒晉更用馬忠子融代谷融卒遣捷為楊稷代之加  
綏遠將軍又進諸牙門皆雜號將軍封吳侯交州刺  
史劉峻大都督修則領軍三攻稷皆為稷所敗鬱林  
九真皆附稷稷表遣將軍毛吳董元等攻合浦戰于  
古城大破吳軍殺峻則稷因表吳為鬱林太守元為

九真太守元病亡更以益州王素代之數攻交州諸  
郡泰始七年春吳王孫皓遣大都督薛珣交州刺史  
陶璜帥二十萬軍與扶嚴惡夷合十萬伐交趾稷遣  
吳及將軍建寧孟岳等禦之戰于封溪衆寡不敵吳  
等敗績僅以身還交趾固城自守破敗之後衆繼千  
人并新附可有四千男女萬餘口陶璜圍之杜塞蹊  
徑救援不至雖班量約食猶不供繼至秋七月城中  
食盡病餓死者大半交趾人廣野將軍王約反應陶  
璜以梯援外吳人遂得入城得稷等皆囚之卽斬稷

長史張登將軍孟通及尺并交趾人邵暉等二千餘  
人受皓詔傳稷秣陵故皓稷及孟幹麋熊李松四人  
于吳通四遠消息稷至合浦發病歐血死傳首秣陵  
棄其屍喪於海幹松熊至吳將加斬刑或說皓宥免  
幹等可以勸邊將皓原之欲徙付臨海郡初稷等私  
誓不能死節困辱虜手若蒙未死必當思求北歸稷  
旣路死幹等恐北路轉遠以吳人愛蜀劍竹弓弩言  
能作之皓轉付部爲弓工九年幹自吳逃返洛陽松  
熊爲皓所殺初晉武帝以稷爲交州刺史大封半道

稷城陷或傳降故不錄幹至表狀乃追贈交州刺史封松熊後嗣侯焉古城之戰毛臯手殺修則則子允隨陶璜璜以臯壯勇欲赦之而允必欲求殺臯臯亦不屈於璜璜怒乃裸身囚結面縛呵曰晉兵賊臯亦烈聲呵曰吳狗何等爲賊吳人生割其腹允割其肝罵曰虜腹臯罵不斷曰尚欲斬汝孫皓汝父何死狗也吳人斬之武帝聞而哀矜卽詔臯子襲爵封諸子三人關內侯九真太守王素以交趾敗與董元牙門王承等欲還南中爲陶璜別將衛濮所獲功曹李祚

見交趾民殘害還遂率吏民保郡爲晉祚舅黎晃爲吳將攻伐祚不下數遣人解喻降之祚答曰舅自吳將祚自晉臣惟力是視矣邵暉子胤先爲父使詣洛拜奉車都尉北還暉敗亡胤依祚固守求救南中南中遙爲之援諸姓得世有部曲弋遣之南征固以功相承也

張氏曰南越處印笮五夷之表不毛閩濮之鄉因九服之外也而能開土列郡爰建方州踰博南越蘭滄遠撫西垂漢武之迹可謂大業然要荒之俗不與華同

安邊撫遠務在得才故高祖思猛士作歌孝文想頗  
 牧咨嗟斯靜禦之將信王者所詳擇也馬霍王尹得  
 失之際足以觀矣交趾雖異州部事連南中故并志  
 焉

南中志終

